

Headline	Pusat kuarantin khusus TLDM		
MediaTitle	Berita Harian		
Date	28 Apr 2020	Color	Black/white
Section	Nasional	Circulation	82,252
Page No	17	Readership	246,756
Language	Malay	ArticleSize	177 cm ²
Journalist	N/A	AdValue	RM 2,995
Frequency	Daily	PR Value	RM 8,986



Pusat kuarantin khusus TLDM

Kuala Lumpur: Tentera Laut Diraja Malaysia (TLDM) menubuhkan beberapa pusat kuarantin sebagai langkah mengekang penularan COVID-19 dalam kalangan warganya.

Panglima TLDM, Laksamana Tan Sri Mohd Reza Mohd Sany, berkata pusat kuarantin itu diwujudkan khusus untuk warga TLDM yang mempunyai simptom COVID-19 dan mereka akan diletakkan di bawah pengawasan untuk saringan kesihatan.

Katanya, antara lokasi pusat kuarantin adalah di Bangunan A 33 bagi warga yang berada di sekitar Pangkalan TLDM Lumut, Perak dan Bangunan 4 Transit Pulau Uda di Pangkalan TLDM Kota Kinabalu, Sabah.

“Berdasarkan statistik semasa kes positif COVID-19, ia menunjukkan tiada pesakit COVID-19 daripada warga TLDM dan kelu-

arga sejak 3 April lalu.

“Keadaan ini harus dikekalkan sebaiknya,” katanya dalam perutusan sempena Hari Ulang Tahun TLDM ke-86 bertemakan ‘Armada Siaga, TLDM Perkasa’, semalam.

Beliau mengingatkan supaya warga TLDM melaksanakan langkah pencegahan dan pengesanan awal COVID-19 bagi memastikan mereka bebas daripada jangkitan COVID-19.

“Saya juga berharap, setiap warga menjaga sensitiviti dan tidak menyalahgunakan media sosial sebagai medium penyebaran maklumat palsu,” katanya.

Mohd Reza berkata, meskipun berdepan ancaman COVID-19, operasi TLDM iaitu penugasan aset di laut meliputi rondaan dan pemantauan masih dilaksanakan secara 24 jam seminggu.

“Operasi juga giat dirancang bagi menghalang sebarang ke-

mungkinan kemasukan pendatang tanpa izin, khususnya ketika semua negara dilanda kemelut COVID-19.

“Aset TLDM perlu sentiasa berada dalam keadaan siap siaga untuk diatur gerak pada ketika ini memandangkan peratus kebarangkalian kemasukan pendatang tanpa izin adalah tinggi,” katanya.

Dalam pada itu, beliau berkata seramai 1,200 anggota TLDM terbabit menguatkuasakan Perintah Kawalan Pergerakan (PKP) menerusi Op Penawar dengan mereka ditugaskan di sekatan jalan raya serta rondaan bersama Polis Diraja Malaysia (PDRM).

“Sebagai barisan hadapan, TLDM berperanan penting bagi membantu kerajaan dalam usaha memutuskan rantaian pandemik ini dan saya menyeru agar warga TLDM kekal fokus dengan tugas dan tanggungjawab masing-masing,” katanya. **BERNAMA**